

Uunga siunnersuut:**Mittarfeqarfiit A/S pillugu Inatsisartut inatsisaat***Mittarfeqarfiit A/S-imik pilersitsineq*

§ 1. Aktianik piginneqatigiiffimmik Mittarfeqarfiit A/S-imik taaguutilimmik Naalakkersuisut pilersitsinissaannut piginnaatinneqarput. Aktiatigut aningaasaatit Naalakkersuisunit aningaasaliissutigineqassapput.

Imm. 2. Ingerlatseqatigiiffik suliffeqarfinnik allanik taaguuteqartunik ingerlatsisinnaavoq.

§ 2. Mittarfeqarfiit nammineertitap Mittarfeqarfiit tamakkiisumik ilaannakortumilluunniit akileeqataassutigineratigut aktiatigut aningaasaatinik aningaasaliinissaannut Naalakkersuisut piginnaatinneqarput. Mittarfeqarfiit pigisaat nalillit, ingerlataallu suut akileeqataassutigineqarnissaat pillugu Naalakkersuisut ersarinnerusumik aalajangersaassapput.

Imm. 2. Ingerlatani imm. 1-imi taaneqartuni akileeqataassutigineqartuni pisinnaatitaaffiit pisussaaffiillu tamaasa Mittarfeqarfiit A/S-ip tigussavai.

§ 3. Kalaallit Nunaanni mittarfinnik, ingerlatanillu tassunga assingusunik, attuumassuteqarsinnaasunilluunniit piginnittuunissamik, ingerlatsinissamillu ingerlatseqatigiiffiup siunertaraa.

Imm. 2. Niuernermik tunngaveqartumik ingerlatseqatigiiffik ingerlanneqassaaq.

§ 4. Mittarfeqarfiit A/S-ip malittarisassai, malittarisassanilu allannguutit Naalakkersuisunit akuerineqassapput.

Imm. 2. Naalakkersuisut akuersiteqqaarnagit Mittarfeqarfiit A/S kattussinnaananiilu agguluttunngortinneqarsinnaanngilaq.

§ 5. Mittarfiit taakkunanilu napasuliat, terminalit aamma sulliviit allaffeqarfiillu, hangarit il.il. aammalu aqqusernit nunaminertanullu pisinnaatitaaffiit taakkununnga atasut, Mittarfeqarfiit A/S-imut akileeqataassutigineqartut Naalakkersuisut akuersiteqqaarnagit toqqaannartumik toqqaannangitsumilluunniit tunniunneqarsinnaanngillat, tunisisoqarsinnaanngilaq, piffissami sivisunerusumi attartortinneqarsinnaanngillat imaluunniit qularnaveeqqusiunneqarsinnaanngillat. Piffissami sivisunerusumi attartortitsineq, ukiunik marlunnik sivisunerusumik attartornissamik isumaqatigiissuteqarnertut paasineqassaaq.

Imm. 2. Pigisat nalillit, imm.1-imi taaneqartut, Naalakkersuisut qularnaveeqqusiissuteqarnissamut akuersinerinik tunngavissaqartoqanngippat, akiitsoqarfinnit malersorneqarsinnaanngillat.

Mittarfeqarfiit A/S-imi aningaasaatinik piginneqataassutsinik tunniussineq

§ 6. Mittarfeqarfiit A/S-imi aningaasaatinik piginneqataassutsinik Kalaallit Airports Holding A/S-imut tunniussinissamik Naalakkersuisut piginnaatinneqarput. Isumaqatigiissuteqarnikkut imaluunniit aningaasaatinik qaffaanermut ilagitillugu akileeqataassuteqarnikkut tunniussisoqassaaq.

Pigisat nalillit suliallu akileeqataassutigineqanngitsut

§ 7. Pigisat nalillit, ingerlatallu Mittarfeqarfiit A/S-imut akileeqataassutigineqanngitsut siunissami ingerlanneqarnissaat, aserfallatsaalineqarnissaallu pillugit Naalakkersuisut aalajangiissapput.

Imm. 2. Pigisat nalillit, ingerlatalluunniit Mittarfeqarfiit ingerlatsinerani ilaasut namminersortunut, pisortalluunniit immikkoortortaannut tunniussinissaannik Naalakkersuisut piginnaatinneqarput. Tunniussinermut atatillugu inuiaqatigiinnut angallanermullu eqqarsaatigisassat isumagineqarnissaannut Naalakkersuisut piumasaqaatinik aalajangersaasinnaapput.

Imm. 3. Mittarfeqarfiit ingerlatsinerani ingerlanneqarsimasunik kommuni tigusinissaanik Naalakkersuisut peqqusisinnaapput. Nammagassat suliasallu agguataarneqarnerat pillugu Namminersorlutik Oqartussat kommunillu akornanni isumaqatigiissummut atuuttumut naapertuuttumik tunniussineq pissaaq.

Mittarfeqarfiit A/S-imi suliat, ingerlatsineq, suliasanillu ingerlatsineq

§ 8. Ingerlatseqatigiiffiup malittarisassai naapertorlugit Mittarfeqarfiit A/S ingerlatsivimmik ingerlatsissaaq.

Imm. 2. Niuerfiit imaluunniit suliasat avataaniit isumagineqartussanngorlugit Mittarfeqarfiit A/S-ip suliaakkiissutigisinnaavai.

§ 9. Ingerlatseqatigiiffiup mittarfiinik atuinermi akigititassanik Mittarfeqarfiit A/S aalajangersaassaaq.

Imm. 2. Mittarfeqarfiit A/S-ip tamakkiisumik ingerlatsinera kiisalu § 3-mi imm. 2-mi kiisalu § 8-mi imm. 1-imi tunngavissanut naapertuuttumik, ingerlatseqatigiiffiup mittarfiutaanik atuinermi akigititassat, akigititassanullu tunngavissat aalajangersarneqassapput.

Imm. 3. Naatsorsuutininut nalinginnaasumik tunngavissat naapertorlugit Mittarfeqarfiit A/S mittarfinnut ataasiakkaanut naatsorsuusiorlunilu missingersuusiusaaq. Mittarfiit ataasiakkaat akuerisaallutillu sullissiviusinnaanerinut pisariaqarlutik nalinginnaasumik ingerlatsineq, aserfallatsaaliineq aningaasaliinerillu naatsorsuutini missingersuutinilu ilaatinneqassapput.

Imm. 4. Aallarnermi akigititat, ilaasunut akigititat, isumannaallisaanermi akigititat, uninnganermi akigititat, ammatitsinermilu akigititat, taakkunanilu allannguutit kiisalu akikillilerutinut akiliuteqartitsinnginnissamullu tungaviit Naalakkersuisunit akuersissutigineqassapput, taamaattoq imm. 6 takuuk. Akigititanik, akigititanullu

tunngavinnik akuersissuteqarnermut atatillugu Naalakkersuisunit pingaarutilittut isigineqartut pillugit Mittarfeqarfiit A/S-ip Naalakkersuisunut nalunaarutigissavai.

Imm. 5. Imm. 4 naapertorlugu akigititat, akigititanullu tunngaviit allanngortinneqarnissaannik Naalakkersuisut piumasaqaasiorsinnaapput, taamaattoq imm. 6 takuuk.

Imm. 6. Pisortat akitsuutaanni akileraarutaannilluunniit allannguutit Naalakkersuisut akuersitinnagit akigititanut ilanngunneqarsinnaapput. Naalakkersuisunut saqqummiussinertaqanngitsumik Kalaallit Nunaanni atuinermik nalilersuisarneq malillugu akigititat ukiumut naleqqussarneqarsinnaapput.

§ 10. Ingerlatseqatigiiffiup mittarfinni ingerlatsineq, aserfallatsaaliineq, aningaasaliinissarlup pillugit mittarfinni pineqartuni ingerlatsinerup attatiinnarneqarnissaannik Naalakkersuisut Mittarfeqarfiit A/S kiffartuussinissamik isumaqatigiissusiornikkut pisussaaffilersinnaavai. Kiffartuussinermik isumaqatigiissutit niuerneramik tunngaveqassapput.

Imm. 2. Kiffartuussinermik isumaqatigiissutit ukiuni arlalinni atuuttussatut isumaqatigiissutigineqarsinnaapput, tassuunakkullu ingerlatseqatigiiffimmi mittarfiit attaveqaasersuutitut tamanut, matumani pisortat inunnik angallassinerat, nassiuusanillu assartuinerat isumagissallugu Naalakkersuisut ingerlatseqatigiiffiullu akornanni kiffartuussinissamik isumaqatigiissutaasut qaqugukkulluunniit ilaatinneqarsinnaanissaat, tunngavileeqataanissaallu qulakkeerneqassalluni.

Imm. 3. Ingerlatsineq, aserfallatsaaliineq, aningaasaliinerlu ilanngunneqarlutik mittarfinnut ataasiakkaanut ukiunut arlalinnut missingersuutit tunngavigalugit kiffartuussinissamik isumaqatigiissutit isumaqatigiissutigineqassapput. Kiffartuussinermi isumaqatigiissutit atuuffissaata sivisoqataanik missingersuutit ukiunut arlalinnut suliarineqassapput.

§ 11. Ingerlatsiviup mittarfiinut il.il. aningaasaliinissami aningaasaliinissamut immikkut pisariaqartitsineq, taakkualu aningaasalersorneqarnissaat pillugu niuerneramik tunngaveqartumik isumaqatigiissusiornissaannik Naalakkersuisut Mittarfeqarfiit A/S pisussaaffilersinnaavaa § 10-mi imm. 2-mi 3-milu piumasaqaatit assinganik atuutissapput.

§ 12. Akileeqataassutigineqartut pillugit piumasaqaatigineqartillugu kisitsisit atorlugit paasissutissanik, assigisaanillu Mittarfeqarfiit A/S Naalakkersuisunut nassiuussissaaq.

Sulisut inatsisitigut inissisimaffii

§ 13. § 2 naapertorlugu mittarfeqarfinni ingerlatani Mittarfeqarfiit A/S-imut akileeqataassutigineqartuni sulisut Mittarfeqarfiit A/S-imi atorfinitsinneqassapput. Suliffeqarfinnik tunniussisoqartillugu sulisut inatsisitigut inissisimanerat pillugu Inatsisartut peqqussutaat atuutissaaq.

Inatsisinut allanut attuumassutillit

§ 14. Mittarfiit ataasiakkaat ingerlanneqarnerinut ilaallutik mittarfinnik taakkunanilu napasulianik, terminalinik, sullivinnik allaffeqarfinnillu, hangarinik il.il. kiisalu aqqusinernik nunaminertanillu piginnaatitaaffiusunik kiisalu ingerlatsinermi atortunik pigisanillu aalaakkaasunik akileeqaataassuteqarnermut atatillugu allagaatit, naqitat, uppersaatit il.il. suliarineqartut, pisortanut naqissusiinermut akitsuuserneqassanngillat.

Atuutilertera

§ 15. Inatsisartut inatsisaat manna nalunaarutigineqarnerata aqaguani atuutilissaaq.

Namminersorlutik Oqartussat, ulloq xx. xxx 2022

Naalakkersuisut Siulittaasuat